

FEDERACIJA BOSNE I HERCEGOVINE

KANTON SARAJEVO

SKUPŠTINA KANTONA

22. Radna sjednica

n/p predsjedavajuće, prof. Ana Babić

ZASTUPNIČKO PITANJE

Prema informacijama kojima raspolazem, u JU Dom zdravlja KS generalni direktor je smijenio rukovodioca Odjela interne revizije i internog revizora, zaposlenike koje je školovala Ustanova za svoje potrebe i premjestio ih na druga mjesta, dok je u Odjel interne revizije postavio zaposlenika koji nema certifikat internog revizora za javni sektor i prema tome ne može ni obavljati revizije, što upućuje da je prećutno došlo do gašenja Odjela interne revizije iako je JU Dom zdravlja KS u obavezi da uspostavi jedinicu interne revizije prema Zakonu o internoj reviziji FBiH i Pravilniku o kriterijima za uspostavljanje jedinica za internu reviziju u javnom sektoru u FBiH, na što je i Ured za reviziju institucija FBiH ukazao prilikom revizije 2010. godine.

Kao razlog premještanja rukovodioca odjela, koji je ekonomista po struci, navode se problemi u radu odjeljenja računovodstva i cijele Službe ekonomsko-finansijskih poslova zbog sporazumnog raskida ugovora o radu sa zaposlenikom koji je obnašao funkciju šefa računovodstva. Rukovodilac Odjela interne revizije nije računovođa i dat mu je uslov u ugovoru o radu da to položi, tj. da se ponovo školuje za potrebe Ustanove. Koliko je meni poznato u Službi ekonomsko-finansijskih poslova je zaposleno 9 ekonomista zajedno sa šefom službe i pomoćnikom direktora za ekonomske poslove, a još nekoliko je završilo ekonomiju i traži da se rasporedi na mjesto visoke spreme. Nije mi jasno zašto se educirani interni revizor premješta u navedenu službu i upućuje na školovanje ponovo, a ne neko od ekonomista iz službe.

Drugi interni revizor je pravnik i raspoređuje se u Službu pravnih, kadrovskih i opštih poslova iz razloga što su dva pravnik na bolovanju. Po Pravilniku o radu, unutrašnjoj organizaciji i sistematizaciji radnih mjesta JU Dom zdravlja KS navedeno mjesto ima tri izvršioca, a u Ustanovi ih je već četiri zaposleno na to mjesto i jedan pravnik na ugovor o djelu.

Iz navedenog možemo reći da očigledno nešto nije u redu u Domu zdravlja. Nameće se pitanje da li rad internih revizora ne odgovara menadžmentu JU Dom zdravlja KS, pa stoga:

- Tražim od Javne ustanove Dom zdravlja KS da dostavi sistematizaciju Odjela interne revizije, mišljenje Federalnog ministarstva finansija na istu koje ustanova po Zakonu o internoj reviziji FBiH mora imati, i kvalifikaciju zaposlenika koji se ugovorom o radu trenutno vodi u Odjelu interne revizije, tj. da li on posjeduje certifikat internog revizora za javni sektor izdat od Federalnog ministarstva finansija da bi mogao vršiti revizije.
- Obzirom da je došlo do smjene oba interna revizora zainteresovana sam i za izvještaj o radu rukovodioca Odjela interne revizije za 2016. godinu, tj. do perioda njegove smjene i tražim da mi rukovodilac Odjela dostavi isti.
- Također, prema mojim informacijama rukovodilac Odjela interne revizije i interni revizor su se obratili i Vladi KS i Ministarstvu zdravstva KS pa me interesuje kakav je odgovor nadležnih institucija, jer se očigledno ovdje ne radi samo o običnom premještanju i to rukovodioca Odjela interne revizije na mjesto koje ne zadovoljava, a internog revizora na mjesto koje je popunjeno, već o prećutnom gašenju Odjela interne revizije koji Dom zdravlja je u obavezi imati.

Godinama smo svjedoci brojnih problema u Domu zdravlja. Prema nacrtu reforme zdravstva koji je sad u javnoj raspravi veliki broj zdravstvenih ustanova se pripaja JU Dom zdravlja KS i mislim da bi, u cilju provođenja kvalitetne reforme zdravstva, trebali pozvati nadležne institucije da izvrše reviziju poslovanja ove Ustanove za period 2015. i 2016. godina (Ured za reviziju institucija FBiH), jer simptomatično je da se javlja otpor i kod drugih zdravstvenih ustanova da postanu dio JU Dom zdravlja KS, a obzirom na ova sadašnja dešavanja oko odjela interne revizije sve implicira na sumnju da se u ustanovi rade nezakonite radnje o čemu upravo interna revizija treba da vodi računa i ukazuje.

Sarajevo, 14.11.2016.

Segmedina Srna Bajramović

Zastupnica SDP BiH u SKS

